

Artistanan preparando pa honra Padu dia 17 di maart



CONTRATISTANAN ta poniendo e ultimo tokenan na Plaza Padu, cu lo keda inaugura diabierna, 17 di maart, 2017. Di otro banda artistanan ta preparando pa rindi honor na Tata di Cultura y co-autor di himno nacional di Aruba den un show sin igual riba e mesun fecha menciona. Den fin di siman cu ta tras di lomba e obra di e artista **Ciro Abath** a wordo transporta pa Plaza Padu. Ta trata di un estatua unda cu por mira Padu sinta na piano y banda di dje e otro musiconan cu a colabora na himno di Aruba, esta **Rufo Wever** y **Lio Booi**. Prome lo tin un ceremonia riba Plaza Padu durante cual por mira mensahe di artistanan di diferente generacion bisando: "Padu ta nos inspiracion" cu ta wordo pasa riba

un pantaya grandi. Hopi t'e artistanan cu no solamente ta admira Padu, pero tin un gradimento special p'e. Asina por menciona **Doedel Sophia**, kende a participa den e **Concierto di Siglo** dedica na Padu y kende a wordo cataloga como e "cuartista oficial di Padu" dor di e propio **Tata di Cultura**. "Mi tabata un hoben di 16 aña ora cu Padu a acepta pa mi toca cuarta cune. Como un mucha homber jong Padu del Caribe a bin te cas pa pidimi toca cuarta, den un actividad di dje. E tabata un di mi soñonan, esta di por toca cu Padu un dia. Pesey e tabata un soño grandi cu a bira realidad. Nunca antes mi a wak Padu personalmente, solamente na television. Y el a bin te mi cas y como cu e tabata un actividad

formal, mi a bisti mi bachi tres ora prome caba. Mi a bisa henter bario cu mi ta bay toca cu Padu y nan no tabata kier a kere," **Sophia** ta corda cu hopi orguyo. El a corda tambe cu e tabata cana cu su cuarta 24 ora pa dia. E tempo ey Padu tabatin su propio grupo y tabata conoci. Pesey Padu tabata un inspiracion grandi pami como musico. Despues mi a sigui toca cun'e de bes encuando y un biaha na Corsou otro soño grandi di **Sophia** a bira realidad ora cu "Padu a declarami como su cuartista oficial. E ta cosnan cu nunca mi por lubida den mi bida." **Doedel Sophia** su otro encuentro bunita cu Padu tabata ora cu el a participa den e **Concierto di Siglo** dedica na Padu del Caribe. Pesey pa por celebra e bida di Padu n'e momento aki, pa honra e gran musico y artista aki ta un orguyo inmenso pa **Doedel Sophia**.

"Danki na Tata Dios cu ainda nos tin'e cu nos," e musico a finalisa bisando. E conocido cantante y musico **Papito Raphael** ta comparti e pensamiento aki. "Mi un musico sumamente privilegia di por a biba pa conoce autor di nos himno Padu. Kende hunto cu **Rufo Wever** y **Lio Booi** a compone. Mi tabatin e privilegio di por a participa den e combo di Padu den e **Concierto di Siglo**, cual ta un biaha a sosode. Hopi di esnan cu a participa den e concierto no tey mas. Pami e tin un lugar hopi grandi den mi curason como un musico Arubiano." Tur e artistanan aki y hopi mas lo rindi honor na Padu diabierna awor riba Plaza Padu y despues cu un concierto riba Plaza **Daniel Leo**.

